

宣統三年九月二十四日 星期二 第八十三號

內閣印鑄局發行

東長安牌樓王府井大街
電話東局二百零一號

內閣官報

內閣官報條例摘要◎第一條 內閣官報爲公布法律命令之機關凡 諭旨章奏及頒行全國之法令統由內閣官報刊布◎第二條 凡京師各衙門通行京外文書均由內閣官報刊布各衙門毋庸再以文書布告其各衙門單行文件並非通行及未便公布者仍應自用文書傳達◎第三條 凡法令除專條別定施行期限外京師以刊登內閣官報之日起各行省以內閣官報遞到之日起卽生一體遵守之効力其各行省先期接有官發印電者不在此限◎第四條 凡未經內閣官報刊布之章程摺奏有在商辦報章登載者不得援據◎第六條 各省布政司衙門應於所屬科員中特派一員經理寄送內閣官報及收集報費事宜並將該員銜名申報內閣年終彙總考成有延誤者照遺誤公文例懲處其無布政司省分由該省督撫飭令度支司派員辦理◎第十一條 京外大小官署均有購讀內閣官報之義務

目錄

宣統三年九月二十四日 第八十三號

宮門鈔

諭旨二道

交 旨二道

事由單

摺奏

度支部奏速議河南等省請撥欸項摺

又奏速議桂撫奏招募軍隊請撥現銀摺

歸化城將軍奏設崇古滿蒙語文小學摺

直督奏請以馬吟菴等充中學教員免扣資俸

片

浙撫奏度支部主事邵長光充高等學堂教務

長請免扣資俸片

又奏大理院推事張宗祥充高等學堂教員請

免扣資俸片

密雲副都統奏報密雲步隊戍關日期並擴張

軍備情形摺

海軍部奏核覆漢陽船廠修造船隻用過工料

銀兩摺

又奏遵議江督奏請以譚耀林補淞北營守備

摺

內閣奏議覆贛撫奏請以王度補上高令摺

又奏議覆浙撫奏請以潘鴻觀補奉化令摺

法部奏請以王樞補京師高等檢察官摺

廣告

宮門鈔

九月二十三日 郵傳部 內務府 廂黃旗值日

奎俊假滿請 安

朗貝勒謝開去軍諮大臣 恩 世中堂謝佩帶印鑰 恩

奎順請假十日 秦綬章續假十五日

劉廷琛 徐坊 高潤生 史履晉 德壽各遞封奏一件

召見慶親王那中堂徐中堂 唐景崇 吳郁生 徐坊

諭旨

監國攝政王鈐章

九月二十三日內閣奉

上諭匝月以來各省紛擾其中情形各有不同應再詳為分別宣示天下凡主張政治改革者對於朝廷迹雖近於要求皆發於愛國之熱誠激而出此朕亦有鑒於國勢之阡危實由政治之弗進業經迭降明諭將實行立憲改良政本之宗旨剴切布告與吾民更始並赦宥從前一切因犯政治革命嫌疑人等及此次革命黨人准其改組政黨收作國家之用至於持種族革命之說者意在離間滿漢激成仇衅禍變相尋必使大局糜爛而後快其私心勢不至同歸於盡不止實與改革政治力謀國利民福者用意迥殊判然兩事朕一秉大公不設成見惟以國家強盛民生康樂為念然必地方安堵而後憲政可以進行若任其鼓吹邪說

肆意擾亂以致吾民流離轉徙死亡枕藉四民失業全國恐慌生計日迫於困窮禍患將何所底止故不憚諄諄誥誥俾爾士紳軍民人等共曉然治亂之大原所有關心政治急於求效之多數人民朕方愛之重之推誠布公共圖上理其背此宗旨而有心爲亂者雖屬少數實有害於公安卽爲全國之公敵當與吾民共擊之若其幡然改悟仍應悉予寬容不咎既往至乘機作亂之各路土匪毫無宗旨專以焚殺淫掠爲事尤爲情法所不容亟宜及時痛剿迅予掃除以安良善各將軍都統督撫等暨各路統兵大員務各仰體朕意分明黨派相機因應爾士紳軍民人等亦當共明此情審擇利害上下一心共謀政治之進步則吾國幸福庶永賴於無窮著各省將軍都統督撫卽將此旨與本月十四日諭旨一併刊刻謄黃通諭知之欽此

奕劻那桐徐世昌署名

監國攝政王鈞章

九月二十三日内閣奉

上諭現在軍事未定所有近畿各鎮及各路軍隊並姜桂題所部軍隊均著歸袁世凱節制調遣隨時會商軍諮大臣辦理欽此

奕劻那桐徐世昌署名

交旨

九月二十三日

監國攝政王鈐章

欽奉

諭旨著派呂海寰充中國紅十字會會長仍兼辦慈善救濟會事宜欽此

奕劻那桐徐世昌署名

監國攝政王鈐章

欽奉

諭旨御史德壽奏京師地廣人稠宜按照警區分設慈善會一摺著呂海寰妥籌辦理欽此

奕劻那桐徐世昌署名

事由單

九月二十三日內摺傳 旨事由單

內閣 奏謹擬前廣州將軍鳳山諡號請 欽定事奉 旨勤節欽此

又 奏前山西巡撫陸鍾琦諡號請 欽定事奉 旨文烈欽此

又 奏總兵成聚等請給廕生事單一件奉 旨依議欽此

又 片奏總督陳夔龍應否准其補廕請 旨事奉 旨准其補廕欽此

又 度支部 奏速議新疆巡撫奏協餉無源請飭部接濟事奉 旨依議欽此

又 奏嚴議蘇州等屬壓徵蘆課奏銷未完各職名事奉 旨知道了欽此

又 奏嚴覆河南陸軍第四案收支各款事單一件奉 旨知道了欽此

又 法部 奏嚴辦秋審情實聲叙人犯事單二件奉 旨依議欽此

又 奏覈辦秋審服制情實人犯事單二件奉 旨依議欽此

又 奏查辦各省秋審留養人犯事單三件奉 旨依議欽此

又 片奏京師留養人犯事奉 旨依議欽此

郵傳部 奏派員代理道清鐵路總辦事奉 旨知道了欽此

內務府 奏十月初一日在 大高殿辦道場溥佑捧表事奉 旨知道了欽此

又 奏十月初一日巳時孟冬禮敬 神照例令薩滿叩頭事奉 旨知道了欽此

恩存等 奏請 派武職值班大臣事奉 旨派出良揆依凌阿常英占鳳欽此

九月二十三日外摺欽奉 硃批事由單

聯 榮 奏報解已酉年大運起程日期摺奉 硃批該衙門知道片併發欽此

又 奏上用緞袖附解起程片奉 硃批覽欽此

三多 綳楚克車林 奏商卓特巴本年例應進京該班據情代奏摺奉 硃批知道了欽此

又 奏車盟扎薩克頭等台吉圖特登報効銀兩請援例加賞公銜片奉 硃批著照所請該部知道欽此

知道欽此

又 奏圖盟扎薩克郡王車林巴伯接管副將軍印信等片奉 硃批知道了欽此

又 奏俄政府贈那丹珠斯塔尼斯拉瓦卽三等寶星應否收受請代奏片奉 硃批准其收受佩帶欽此

佩帶欽此

又 代奏堪布等呈請將誤工之公棍楚克丹巴懲處摺奉 硃批理藩部議奏欽此

三多 奏蒙古大臣等應值年班懇免進京以資贊助摺奉 硃批著照所請該部知道欽此

籌摺 奏 財政類

度支部奏併案速議河南等省請撥款項摺

奏為併案速議恭摺仰祈 聖鑒事竊本月初十日奉

旨寶棻電奏悉據稱前因軍用

浩繁奏准由部設法接濟昨委員回豫僅據交到銀十五萬兩並以北軍業經撥款無須由豫

接應此項專作本省防費囑令樽節動支但豫中正在紛亂大軍日需糧食等項為數甚鉅至

今未見發還分文豈能以部中業經撥款稍存膜視且事前之籌備兵士之恩賞又豈能斤斤

計較至於練兵籌防均非空言所能濟事部撥之數不出數日行將告罄譁潰堪虞請飭度支

大臣無論何款再行接濟四五十萬兩等語著度支部速議具奏等因欽此又初十日奉

旨朱家寶電奏皖省居長江中權餉絀兵單較他省為尤甚前請添募五營因無的餉迄未開

招而鄰氛日逼英山霍山一帶界連蕪黃岌岌可危原駐防營萬難抽調酌派六十一標第三

營先赴英山扼要駐紮並飭各州縣舉辦鄉團自九江失守匪勢愈逼愈近安慶僅泊一兵輪

雖准調用因未經指定艦號不免隨意開去難以挽留熟籌形勢必多派兵輪指定艦號歸皖

調度而後可固江防目前餉需羅掘已窮赤手飢軍危迫萬狀准部覆商借運庫十萬現尙未

到到亦不濟事懇恩俯念防務萬緊關係下游數省安危仍如前請截留各項解款並飭部迅

撥現銀五十萬兩等語所籌布置尙合機宜各項解款業由度支部奏明准其暫行挪用所請

飭部迅速籌現銀五十萬匯皖救急著度支部速議具奏等因欽此又十一日奉 旨長庚

電奏陝西朔日省城兵變城陷旗營受害尤慘各官不知下落省報數日不通亟應派隊赴援

惟現有防營均駐紮各要地未便遽行調離恐有疏虞現已分飭調撥一面迅募得力兵勇星

夜赴陝並添募防營捍衛地方但甘省以協餉為命脈現值陝西城陷東道不通協款無著甘

庫如洗募兵購械需款浩繁請飭度支部迅撥銀一百萬兩等語著長庚迅派得力兵隊星夜

赴援並一面添募防營捍衛地方所請飭部撥銀一百萬兩之處著度支部速議具奏欽此欽遵先後由內閣抄交到部臣等伏查此次鄂省用兵大局牽動各省紛紛請款警電交馳均屬異常危迫該督撫等以本省餉需奇絀請飭部籌撥鉅款自係實情惟目前餉源枯竭供億浩繁部庫已有岌岌不支之勢臣等不得已始奏請息借洋款以供要用現在合同雖已訂定而付款尚未定期祇有俟此項借款交到後再由臣部酌量勻撥各該省以資接濟至甘省協餉已由臣部分電嚴催迅速籌解所有併案速議緣由理合恭摺具陳伏乞皇上聖鑒謹奏宣統三年九月十六日奉 旨依議欽此

度支部奏速議廣西巡撫電奏招募軍隊請撥現銀摺

奏為遵 旨速議具奏恭摺仰祈 聖鑒事本月十二日奉 旨沈秉堃電奏悉初八

日曾經有旨著張鳴岐沈瑜慶迅派得力兵隊並籌餉械赴援現據張鳴岐覆奏粵防亦緊難於兼顧著沈秉堃迅即就地招募軍隊以資防剿至於梧州口須駐兵艦著海軍部酌量調撥所請加撥現銀五十萬著度支部速議具奏欽此欽遵由內閣鈔交到部臣等伏查廣西毗連湘粵伏莽孔多值鄰封有事之秋防務尤不容稍緩前經臣部以桂防吃緊請由兩廣總督體察情形就近撥濟奏准電知在案嗣於本月十二日奉 旨張鳴岐電奏前在桂撫任內曾於捐輸溢額項下撥有各種專款合計三百餘萬均屬專款存儲不准挪借別用現在籌防無款不妨先其所急暫行挪撥等語著沈秉堃將以上各款查明移緩就急以濟餉需等因欽此仰見 朝廷厪系邊疆統籌財政之至意各國籌備戰時經費往往移用特別會計費金今桂防萬緊部庫實無餘力兼顧惟有令該撫遵照 諭旨於專款存儲各項下暫行挪用事定後再籌款歸還以顧要需而支危局如蒙 俞允即由臣部電知該撫欽遵辦理所有臣等遵議緣由理合恭摺具陳伏乞 皇上聖鑒謹 奏宣統三年九月十六日奉 旨依議欽此

摺奏 學務類

歸化城將軍麟壽奏設立崇古滿蒙語文小學摺

奏爲土默特旗滿蒙語文誠恐荒廢籌款設立崇古滿蒙語文小學以保國粹而資任使恭摺具陳仰祈 聖鑒事竊查歸化城副都統衙門爲辦理土默特旗行政總匯之區該旗東連察哈爾左右兩翼西接馬蘭察布伊克昭二盟往來公牘多用滿蒙文字此項人員皆取材於本旗光緒三十二年間前副都統 臣文哲琿因土默特旗蒙古子弟與漢民相處年久語言文字漸忘所本在於該旗高等小學堂內附設滿蒙文一科以期保存國粹而養成通譯人才乃鐘點無多且偏重別項科學故附設數年以來成績甚屬寥寥伏查滿蒙語文爲旗藩之根本土默特接壤兩翼兩盟舉凡承轉文告多以滿蒙文字爲重若不特設專科隨時研究恐現在者將日就荒廢未來者復繼起無人 臣麟壽與各叅領會商就該旗舊有十王廟官房設立滿蒙語文小學堂一所名曰崇古滿蒙語文小學查照京師滿蒙文高等學堂定章參以就地情形修葺講堂齋舍如空氣之容量光線之射力悉力求合格考取該旗十六歲以上學生三十餘名入堂肄業以滿蒙語爲主課輔以普通各科學俾養成明體達用之才以備行政任使應需開辦及常年經費擬請由前副都統 臣文瑞試辦加增煤稅項下核實動支作正開銷除將該堂簡章及一覽表冊暨開辦大概情形於宣統二年九月分咨理藩部度支部學部備案外所有 臣動支煤稅設立崇古滿蒙語文小學緣由謹會同綏遠城將軍 臣堃岫恭摺具陳伏乞 皇上聖鑒訓示謹 奏宣統三年九月十七日奉 硃批該部知道欽此

直隸總督陳夔龍奏請以馬吟菴等留直仍充中學教員免扣資俸片

再查奏定章程內載辦理學堂凡總理監督及總分教習各差均准調用京外人員相助爲理免扣資俸等語
歷經遵辦在案茲查有深澤縣私立中學堂英文教員馬吟菴由高等學堂畢業獎給進士以主事儘先補用簽
分學部正定府中學堂教員黑樹銘由北洋大學堂畢業獎給進士以主事儘先補用簽分農工商部均例應
赴京供職惟該員等現充各該堂教員深資得力未便遽易生手擬請留於直隸仍充原差並照章免扣資俸
俾得專心教授實於學務不無裨益據提學使傅增湘詳請奏咨前來臣覆核無異合無仰懇 天恩俯准
將學部司務馬吟菴農工商部儘先補用主事黑樹銘等二員留直仍充原差免扣資俸出自 鴻施除分
咨外理合附片具陳伏乞 聖鑒訓示謹 奏宣統三年九月十六日奉 硃批允行該部知道欽此

浙江巡撫增韞奏度支部主事邵長光充高等學堂教務長請免扣資俸片

再查學部奏定章程京員辦理外省學堂充當總理或監督總分教習者准免扣資俸等因歷經遵辦在案茲
據署提學使袁嘉穀詳准高等學堂監督咨稱該堂教務長兼英文教員邵長光於本年恭應 廷試一等
奉 旨以主事分部補用隨經籤分度支部當因該堂辦理畢業屢次電催該員未及到部匆促回堂嗣因
計畫開堂一切事宜凡支配功課及商酌教授方法該員職居教長在在相需自不能任其暫離造具履歷呈
司詳請 奏咨前來臣覆核無異合無仰懇 天恩俯准將度支部主事邵長光照章免扣資俸除將履歷

分咨查照外謹附片具陳伏乞 聖鑒謹 奏宣統三年九月初二日奉 硃批允行該部知道欽此

●又奏大理院推事張宗祥充高等學堂教員請免扣資俸片 再查學部奏定章程京員辦理外省學堂充
當總理或監督總分教習者准免扣資俸各等因歷經遵辦在案茲據署提學使袁嘉穀詳稱准高等學堂監
督咨稱中國文學及中國地理兩科目學科重要教授需人茲查有請假回籍之大理院推事張宗祥堪以延
聘爲文學地理教員造具履歷呈司詳請 奏咨前來臣覆核無異合無仰懇 天恩俯准將大理院推事

張宗祥免扣資俸以符定章除將履歷分咨查照外謹附片具陳伏乞 聖鑒謹 奏宣統三年九月初二
日奉 硃批允行該衙門知道欽此

摺奏 軍政類

密雲副都統福海奏報密雲步隊戍關日期並擴張軍備情形摺

奏為恭報密雲陸軍步隊一營戍守邊關日期並瀝陳擴張軍備情形恭摺具陳仰祈 聖鑒事竊 臣於九月初六日接准直隸總督 臣陳夔龍來電准陸軍部電稱密雲距古北口甚近該口原駐直隸提督 臣姜桂題所部之軍現均調赴通州地方甚屬空虛擬將密雲駐防練成之陸軍步隊一營調赴古北口一帶紮防等因前來 臣隨遣派陸軍管帶卓異記名副都統軍功藍翎協領文華於九月初八日整隊開拔伏查古北口一帶地方遼闊關隘林立僅此一營實屬不敷分配密雲原有巡防步隊二營馬隊一營現已改編陸軍步隊二營擬與原練陸軍合成一標以之填防各口外可為熱河之後援內可為 京師之側衛戍守雄關以備緩急惟官兵薪餉尚未請支業由 臣咨商軍諮府陸軍部去後旋准陸軍部來電令 臣自行接商直隸總督 臣陳夔龍妥籌餉糈以重邊備除由 臣咨商辦理外謹先將密雲陸軍步隊一營戍邊日期恭摺具奏伏乞 皇上聖鑒謹 奏宣統三年九月十七日奉 硃批該衙門知道欽此

海軍部奏核覆湖北漢陽船廠元年修造船隻用過工料銀兩摺

奏為核覆湖北漢陽船廠宣統元年分修造船隻用過工料銀兩恭摺仰祈 聖鑒事竊據內閣鈔出湖廣總督瑞澂具奏長江水師漢陽船廠宣統元年分修造船隻用過工料銀兩數目一摺宣統三年正月二十三日奉 硃批該部知道欽此欽遵到部並據該督造冊咨部前來查冊開新造舢板四隻長龍一隻共用湘平銀二千五兩八錢四分六釐九毫七絲五忽一微七纖大修舢板三十八隻大修舢板二隻共用湘平銀七千九百五十七兩九錢五分八釐四毫七絲五忽六微更換蓬索舢板四十八隻大舢板二隻長龍八隻共

用湘平銀九百五十兩九錢五釐八絲三忽六纖以上總計湘平銀一萬一十四兩七錢一分五毫三絲三忽八微三纖尙屬核實應准開銷至委員薪水水夫役工食局用雜費等項應由度支部核銷所有臣部核覆長江水師漢陽船廠修造船隻用過工料銀兩准銷緣由理合繕摺具陳伏乞 皇上聖鑒謹 奏宣統三年八月十四日奉 旨知道了欽此

海軍部奏遵議江督奏請以譚耀林補淞北營守備摺

奏爲遵 旨議奏事內閣鈔出兩江總督張人駿奏江南裏河水師淞北營左哨一隊守備員缺查有該營右哨一隊千總譚耀林水師曉暢人亦精明堪以升補等因一摺宣統三年七月十三日奉 硃批海軍部議奏欽此欽遵到部查水師題補輪缺新章守備以十缺爲一輪一缺儘先二缺預保卓異如預保卓異無人以現任俸滿人員抵補又輪用應升人員查明到任日期論俸升補又裏河水師歷俸二年各等語江南淞北營左哨一隊守備係裏河水師題補新章第一輪第二缺應用預保卓異該省水師並無預保卓異人員自應照章以俸滿應升之員抵補該督請以淞北營右哨一隊千總譚耀林補授查譚耀林湖南人年四十三歲由行伍歷拔裏河水師淞北營右哨一隊千總光緒三十年八月受劄三十四年七月十五日任事嗣於蘇省海運案內出力保以守備補用今請升補淞北營左哨一營守備歷俸已滿二年現無事故核與定例相符應請准其升補恭候 命下遵卽行文該督按限給咨該員赴部引 見後再行給予劄付令其承領赴任所有臣等遵議兩江請補裏河水師守備員缺緣由理合恭摺具陳伏乞 皇上聖鑒訓示遵行謹 奏宣統三年八月二十六日奉 旨依議欽此

摺摺 奏 叙官類

內閣奏議覆江西巡撫馮汝駉奏請以王度補上高縣知縣摺

奏爲遵 旨議奏事江西巡撫馮汝駉奏稱上高縣知縣蔡思幹降調遺缺前准部咨應用改選班人員查有勞績儘先改選知縣王度年富才優堪以署理等因宣統三年閏六月二十八日奉 硃批內閣議奏欽

此查吏部奏定改選章程內開嗣後改選截缺應按雙單月分班擬選又班次最前者卽作爲該省頂選之員雙月班次最前者雙月缺出先儘擬用又暫行章程內開初任候補試用及河工人員補缺試署試俸名目應一併化除各等語今江西上高縣知縣蔡思幹降調遺缺歸宣統三年二月分截缺係選缺應以改選班擬選查江西雙月知縣上次用至難廕後第一勞績捐納先止今此一缺查坐補及各項不積缺人員各項在前應選班次均無人據該撫請以勞績儘先知縣王度署理查王度四川成都縣附貢生報捐知縣不論雙單月選用光緒三十二年投供候選因五城獲盜出力保以知縣不論雙單月儘先選用因州縣停選呈請分發捐指江西宣統二年九月二十日到省以之擬選核與章程相符理合奏明請 旨准將改選班勞績儘先知縣王度補授上高縣知縣銜缺相當毋庸咨送引 見所有遵議緣由謹繕摺具陳伏乞 皇上聖鑒謹奏宣統三年八月二十三日奉 旨依議欽此

內閣奏議覆浙江巡撫增韞奏請以潘鴻觀補奉化縣知縣摺

奏爲遵 旨議奏事據浙江巡撫增韞奏稱奉化縣知縣王汝賢修墓開缺應行歸選查有改選班貢生教習知縣潘鴻觀踐履篤實辦事勤能堪以請署等因宣統三年閏六月二十九日奉 硃批內閣議奏欽此查改選章程內開嗣後改選截缺應按雙單月分班擬選又班次最前者卽作爲該省頂選之員雙月班次最前者雙月缺出先儘擬用又暫行章程內開初任候補試用及河工人員補缺試署試俸名目應一併化除各

等語今浙江奉化縣知縣王汝賢修墓遺缺歸宣統三年四月分截缺係選缺應以改選班擬選查浙江雙月知縣上次用至雙月升班先之先止今此一缺查坐補及各項不積缺人員各項在前應選班次均無人據該撫請以貢生教習知縣潘鴻觀試署查潘鴻觀直隸寶坻縣恩貢由八旗官學教習期滿奉 旨著以知縣

用因州縣停選呈請分發籤掣浙江宣統二年七月十二日到省以之擬選核與定章相符理合奏明請旨准將改選班貢生教習知縣潘鴻觀補授奉化縣知縣銜缺相當毋庸咨送引 見所有遵議緣由謹繕摺具陳伏乞 皇上聖鑒謹 奏宣統三年八月二十三日奉 旨依議欽此

法部奏請以王樞補京師高等檢察官摺

奏為遴員請補京師高等檢察廳檢察官員缺以重職守恭摺仰祈 聖鑒事竊查法官考試任用暫行章程第十三條內載京師高等檢察廳檢察官如現無合法法院編制法第一百十八條之資格人員應補者京師由法部按照本章程第十一條辦理茲京師高等檢察廳檢察官孫寶瑚保送知府所遺一缺京外各廳現無合法法院編制法第一百十八條之資格人員自應查照法官考試任用暫行章程以考試成績最優人員請補查有高等檢察廳候補從五品推檢署檢察官王樞法學優長趨公勤慎由揀選知縣光緒三十三年八月咨調到廳宣統元年三月奏留以五六品檢察官候補在京師法律學堂優等畢業經學部奏獎以臣部員外郎儘先補用上年補行考驗照章免考本年三月經臣部奏准以從五品推檢候補歷署檢察官奮勉從公深資襄助以之請補高等檢察廳檢察官洵堪勝任與例亦屬相符現據高等檢察長徐謙呈請奏補前來合無仰懇 天恩准將該員王樞補授高等檢察廳檢察官以專責成而資得力如蒙 俞允即由臣等咨送內閣驗放奏請補授所有遴員請補高等檢察廳檢察官員缺緣由謹恭摺具陳伏乞 皇上聖鑒訓示謹 奏宣統三年九月十四日奉 旨依議欽此

啓者本報定章收費一律現洋概不收取郵票遠省定購請由郵局匯洋以歸劃一
本報謹啓

●本局新出各種要書(躉批照章折扣)

奏定各省諮議局並選舉各章程一册大洋一角五分○諮議局章程及選舉章程解釋彙鈔已出十一册每册大洋壹角○憲政分年籌備事宜表一册大洋貳角○憲法大綱一册大洋六分○奏定城鎮鄉地方自治章程一册大洋一角○京師地方自治章程一册大洋一角二分○資政院議員選舉章程一册大洋一角○欽定府廳州縣地方自治章程一册大洋一角

●本局新印 考察政治大臣編譯各書廣告

日本統計釋例	每部二册價銀六角	日本憲法說明書	每部一册價銀四角
日本憲政略論	每部一册價銀一角	譯書提要	每部一册價銀一角
駐奧使館報告書	每部一册價銀三角	日本政治要覽	每部二册價銀六角
日本議會詰法	每部二册價銀八角	法國政治要覽	每部一册價銀三角
比國政治要覽	每部一册價銀三角	日本丙午議會	每部一册價銀四角
日本憲法疏證	每部二册價銀六角	英國財政要覽	每部一册價銀三角
日本官制通覽	每部一册價銀三角	新出英國議院答問	每部一册價銀二角五分
新出英國政府答問	合訂一册價銀一角五分	新出英國地方自治答問	每部一册價銀一角五分
新出英國財政答問	每部一册價銀一角	新出英國皇室制度答問	每部一册價銀一角五分
核訂現行刑律案語	每部價洋拾元		

以上各種均為講求法政最要之書北京琉璃廠上海棋盤街商務印書館內均有代售躉批五十部以上九折百部以上八折千部以上七折外埠郵費照遠近酌加
總發行所北京王府井大街內閣印鑄局

內閣官報發行章程摘要

- 第一條 印鑄局設發行所專管官報寄遞京外事宜
- 第二條 內閣官報每日出報一分每月收回報價大洋八角常年八元郵費在外概不零售
- 第三條 內閣官報發行以十二個月為一年六個月為半年
- 第四條 在京各部院按日送閱一分至三分不收報費外其各署廳司局處另行在本局訂購者均於每日出報後即刻派人專送
- 第五條 各省除司法行政各官廳皆有購讀官報義務外凡武職旗營自治團體學堂及候補人員本地紳民均可向布政司或度支司衙門經理官報處購買
- 第六條 前條閱報人員有欲徑向印鑄局掛號按日徑寄者每分先繳報費並酌交郵費由局按日另寄
- 第七條 在京分送各報係由印鑄局送報夫役走送者均登送報簿如有遺漏遲誤閱報人得隨時函告印鑄局處理外寄各報有遺漏者由經理官報處或閱報人函知印鑄局查補
- 第八條 遠近定購本報至少須先定半年預繳報費後給予定報收單即照開明地址分別送寄如有遷移事故隨時知照以便更改
- 第九條 內閣官報除在京由印鑄局發行及准各報房承領在外由布政司或度支司發行外各省官報局商報館以及殷實店舖有願代銷者函告印鑄局發行所書明認領報數即可訂定照寄扣給報價二成作為酬勞惟應常年先付報價三個月以昭憑信願領銷多分者得另訂合同
- 第十條 除各官廳官有事業官立學堂示諭廣告外凡京外官商曾經奏明辦理之銀行鐵路鑛務及在農工商部註冊設立各項公司並有確實證據之不動產欲刊印單篇告白隨報附送者可函請本局核定刊登其附送以本京為限五行起碼第一日至三日每日五元四日以下四元五角六行以下第一日至三日每日每行加五角四日以下每行加四角五分其附登本報則以半面起碼第一日每半面洋十元第二日至第十日每半面日收洋八元十一日至一個月每半面日收洋六元第二月後每半面日收洋五元以後官報行銷愈廣再行改訂凡各官廳及官有事業學堂公益等事欲附登本報者酌收半費
- 第十一條 書報各項無論何處代銷除照郵政定章酌收郵費外概照印鑄局定價發售不得私自增加